

HIDUP BERTUHAN

Ujian merupakan didikan Allah secara senyap tetapi mengajar insan erti hidup bertuhan. Percayalah sesuatu musibah yang Allah turunkan itu tidak akan berlaku dengan sendirinya melainkan ada sesuatu yang memicukan agar Allah turunkan kelaknatan ke atas seseorang itu. Buktinya, Allah berfirman dalam nada yang tegas.

"Dan musibah apa pun (gempa bumi, penyakit menular) yang menimpa kamu, adalah disebabkan oleh perbuatan tanganmu sendiri dan Allah memaafkan sebagian besar (dari kesalahan-kesalahanmu)."

(Asy Syuura 42: 30)

Meniti hidup sebagai seorang insan pasti punyai banyak ranjau dan ujian. Kekadang ujian yang ditempuhi berupa kepayahan hidup, kesempitan wang, sakit dan bermacam-macam lagi musibah ranjau kehidupan.

Tidak dilupakan juga sesekali Allah turunkan ujian berupa kesenangan hidup, kekayaan harta benda, kenikmatan ke atas sesuatu perkara yang mungkin pada hakikatnya perkara tersebut mendatangkan murka Allah SAW. Ke semua ini Allah anugerahkan kepada setiap insan untuk menguji siapakah di antara hambaNya yang betul betul layak dianugerahkan kenikmatan yang hakiki iaitu syurgaNya.

Menanamkan rasa takut dan gerun dengan azab Allah ini perlu. Tanpa rasa takut dan gerun jiwa manusia yang dibadai nafsu pasti membuak. Dengan menanamkan rasa kesedaran di dalam sanubari bahawa seandainya melakukan maksiat kepada Allah pasti Allah datangi musibah, hati kita pasti akan terdidik dan luluh takutkan Allah, Pencipta sekalian alam.

Lihatlah sekeliling kita, entah berapa ramai sahabat taulan diuji oleh Allah mungkin di atas perkara yang dilakukan oleh mereka. Ambillah iktibar dan terus menerus memohon kepada Allah agar tanamkan rasa takut kita melakukan sesuatu perkara yang mendatangkan musibah dan azab dari Pencipta.

Mengembalikan segalanya kepada Allah

Semasa menempuh satu satu ujian, hati, perasaan dan segalanya harus pasrah dan mendambakan segalanya kepada Allah. Kesabaran yang hakiki adalah kesabaran yang mampu menyedarkan manusia bahawa semua yang ada di dunia milik Allah dan cepat atau lambat pasti akan kembali kepada Allah, "(orang-orang yang sabar yaitu) orang-orang yang

apabila ditimpa musibah, mereka mengucapkan Inna Lillaahi wa innaa ilaihi raaji'uun (Sesungguhnya kami milik Allah dan kepada-Nyalah kami kembali)."

Seluruh yang ada ini milik Allah, termasuk harta, rumah, anak, isteri dan sebagainya. Semua itu diamanahkan kepada kita. Untuk selanjutnya akan diminta pertanggungjawaban di akhirat nanti. Sebagai Pemilik, Allah berhak mengambilnya bila-bila saja sekehendak-Nya. Karena itulah, kita harus mempersiapkan diri sebaik-baiknya jika datangnya waktu diri, harta, anak, isteri dan semua yang ada di sekitar kita diambil oleh Allah.

Justeru, marilah jiwa-jiwa dan hati-hati insan yang gerun kepada Allah, marilah kita bertaubat dengan sebenar taubat di atas segala yang telah kita lakukan. Pada hari ini kita mungkin selesa atau nikmat melakukan perkara yang Allah benci. Tetapi sedarlah wahai insan, hari ini mungkin kita selesa tetapi ke mana lagi kita hendak lari di dunia ini, segalanya di bawah pantauan dan kepungan Ilahi. Bila-bila masa sahaja Allah ranapkan. Mari kita terus dan terus berdoa dan beristighfar agar Allah ampunkan kita dan tanamkan rasa takut untuk kita bermaksiat kepada Allah.

~ Katakanlah: "Dialah Allah Yang Maha Penyayang kami beriman kepada-Nya dan kepada-Nya-lah kami bertawakkal. Kelak kamu akan mengetahui siapakah yang berada dalam kesesatan yang nyata"~

Al-Mulk: 67: 29